

Sumáriu Kazu
Tribunál Distritál Oekusi
Jullu 2020

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 26

Tipu kazu	Tipu kazu	Númer u
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	15
Artigu 171 KP ho artigu 145 KP, konjuga ho artigu 2, 3, no 35(b) no 36 (LKVD)	Koasaun seksuál ho ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	1
Artigu 154 KP	Maus tratus ba kónjuje	1
Artigu 316 KP	Kontrabandu	3
Artigu 145 KP	Ofensa ba interidade fízika simples	3
Artigu 140 KP	Omisídiu negligente	1
Artigu 148 KP	Ofensa ba integridade fízika negligente	1
Artigu 206 KP	Ultraje ba símbolu nasional	1
Totál		26

2. Totál desizaun ne'ebé JSMP monitoriza : 24

Tipu desizaun	Númeru
Prizaun (Artigu 66 KP)	1
Suspensaun ba pena prizaun nia ezekusaun (Artigu 68 KP)	17
Suspensaun ba pena prizaun nia ezekusaun (Artigu 68 KP) no absolve	1
Pena multa (Artigu 67 KP)	2
Omologa pedidu dezisténsia	3
Totál	24

3. Totál kazu sira ne'ebé adia tuir JSMP monitorizasaun : 0

Razaun adiamentu	Númeru
Laiha	0
Totál	0

4. Total kazu sira ne'ebé kontinua prosesu tuir JSMP nia monitorizasaun :2

B. Deskripsaun sumáriu julgamentu ba desizaun kazu sira

1. Krime ofensa ba integridade fízika simples

Nú. Prosesu : 0008/16.OESIC
 Kompozisaun Tribunál : Singulár
 Juis : Dr. Hugo da Cruz Pui
 Prokuradór : Dr. Mateus Nesi
 Defeza : Dr. Marcelino Marques Coro
 Desizaun : Omologa pedidu dezisténsia keixa

Iha 02 Jullu 2020, Tribunál Distritál Oekusi prezide julgamentu tetantiva konsiliaun ba krime ofensa ba integridade fízika simples ne'ebé envolve arguidu Benedito Mesquita hasoru Augusto Mesquita nu'udar nia primu, iha Suku Costa Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 11 Janeiru 2016, maizumenus iha tuku 12:00 meiodia, arguidu no lezadu iha kondisaun lanu no sira diskute malu. Arguidu tuku lezadu dala ida iha hasan parte karuk no tuku dala ida iha kotuk laran rezulta moras. Kazu ne'e aneksa hamutuk ho relatóriu médiku husi Ospital Referral Oekusi no fotografia husi polisia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, antes tama ba prosesu produsaun ba prova sira, juis husu uluk ba parte sira atu halo tentativa konsiliaun.

Iha prosesu tentativa konsiliaun ne'e, lezadu deklara katak nia hakarak deziste tiha keixa hasoru arguidu sein kondisaun ruma tanba arguidu nu'udar nia primu. Arguidu konkorda no hakarak dame malu ho lezadu. Arguidu mós promote sei la komete tan krime hasoru lezadu iha futuru. Tanba ne'e, lezadu husu ba tribunál atu deziste ninia keixa kontra arguidu.

Alegasaun finál

Prokuradór no defeza konkorda ho parte rua nia akordu dame ne'e no husu ba tribunál atu omologa prosesu ne'e.

Desizaun

Bazeia ba akordu hosi parte sira no pedidu dezisténsia hosi lezadu, tribunál omologa prosesu ne'e.

2. Krime ofensa ba integridade fízika simples ho natureza violénsia doméstika

Nú. Prosesu	: 0057/19.OESIC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Matias Soares
Defeza	: Dr. Marcelino Marques Coro
Desizaun	: Pena prizaun fulan 3 suspende ba tinan 1

Iha 02 Jullu 2020, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AL hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 18 Abril 2019, maizumenus iha tuku 09:00 dadeer, arguidu basa dala ida iha lezada nia hasan loos no dala ida iha hasan karuk rezulta bubu, mean no moras. Antes ne'e, lezada hakilar ba arguidu atu la bele bolu sira nia oan ho lian maka'as. Kazu ne'e aneksa hamutuk ho relatóriu médiku husi Pradet. Antes ne'e, lezada refere husi Ospital Referál Oekusi ba Pradet. Fotografia kona-ba lezada nia sofrimentu mai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun no deklarata katak nia hatene kuandu basa ema hanesan ne'e sei prejudika ema nia saúde fíziku no sofre moras maibé arguidu nafatin halo. Mezmu nune'e, arguidu arrepende ninia hahalok no promete sei la halo tan hahalok hanesan hasoru lezada iha futuru. Arguidu deklarata tan katak depoisde akontesimentu, arguidu ho lezada dame malu ona no kontinua hela hamutuk iha uma ida to'o agora. Arguidu mós foin primeiravés halo krime hasoru lezada no mai hatan iha tribunál. Arguidu iha oan na'in rua ho rendimentu kada fulan US\$55.00 tanba arguidu serbisu hanesan professor voluntáriu iha Escola Pre-Sekundáriu ida iha Oekusi.

Nune'e mós lezada kontinua konfirma faktu sira hotu iha akuzasaun no mós arguidu nia deklarasaun katak dame malu ona no hela hamutuk nafatin iha uma ida no sira na'in rua mak tau matan ba sira nia oan na'in rua ne'e.

Alegasaun finál

Prokuradór konsidera arguidu provadu halo agresaun fízika hasoru nia feen bazeia ba arguidu nia konfisaun. Arguidu basa lezada dala ida iha hasan loos no dala ida iha hasan karuk atu prejudika lezada nia kondisaun fíziku. Aleinde ne'e, kazu la'en baku feen dalabarak ona akontese iha territóriu Timor-Leste liuliu iha RAEOA. Bazeia ba konsiderasaun sira ne'e, husu ba tribunál atu kondena arguidu ho pena prizaun tinan ida suspende ba tinan ida.

Enkuantu defeza haktuir katak arguidu konfesa intregalmente ba faktu sira iha akuzasaun, arrepende ninia hahalok, dame malu ona ho lezada, kolabora ho tribunál. Arguidu mós promete sei la halo tan krime hasoru nia membru família ka ema seluk iha futuru. Bazeia ba sirkunstánsia sira ne'e hotu, defeza husu ba tribunál atu aplika pena ne'ebé kmaan ba arguidu.

Desizaun

Tribunál prova katak arguidu basa lezada dala ida iha hasan loos no dala ida iha hasan karuk. Tribunál konsidera arguidu halo agresaun ne'e hasoru feto ne'ebé laiha forsa. Bazeia ba prova sira no konsidera sirkunstánsia atenuante sira hanesan arguidu konfesa, arrepende ninia hahalok, dame malu ona ho lezada, foin primeiravés halo krime, iha oan na'in rua, arguidu serbisu hanesan professor voluntáriu iha eskola pre-sekundáriu ida ho rendimentu kada fulan US\$55.00 no promete sei la repete ninia hahalok iha futuru, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

3. Krime maus tratus ba kónjuje

Nú. Prosesu : 0022/18.OESIC

Kompozisaun Tribunál : Koletivu

Juis : Dr. Hugo da Cruz Pui, Dr. Evangelino Belo no Dr. Yudi Pamukas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun efetiva tinan 4

Iha 02 Jullu 2020, Tribunál Distritál Oekusi prezide julgamentu leitura akordaun ba krime maus tratus ba kónjuje ne'ebé envolve arguidu HFS hasoru lezada nu'udar nia feen, iha Distritu Oekusi.

Akuzasaun Prokuradór

Prokuradór akuza katak iha 11 Fevereiru 2018, maizumenus iha oras tuku 18:00 lokraik, arguidu foti fatuk no tuda iha lezada nia kanotak parte loos no tuda dala ida tan iha brasu parte loos kauza bubu no moras. Arguidu mós uza nia liman loos habit lezada nia ulun no tuku dala ida iha ulun no fai lezada nia ulun ba iha armáriu kauza bubu no moras. Arguidu kontinua tebe dala rua iha kidun no tuku dala ida iha kotuk laran no buti dala ida iha lezada nia ibun kauza kanek kois, ran no moras. Antes ne'e, arguidu deskonfia lezada amante ho mane seluk. Arguidu halo agresaun hasoru lezada kada fulan liu dala ida. Kazu ne'e aneksa hamutuk ho relatóriu médiku husi Ospital Referral Oekusi no fotografia husi polísia.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál tinan 2 to'o tinan 6 prizaun.

Produsaun ba prova sira

Iha julgamentu ne'e, arguidu hakarak hili direitu la ko'alia ka nonook.

Entretantu lezada antes ne'e konfirma de'it faktu balun iha akuzasaun katak arguidu tuda duni lezada ho fatuk kona iha kanotak parte loos, tuda dala ida tan ho fatuk no kona iha brasu parte loos no arguidu habit lezada nia ulun hodi tuku dala ida iha ulun no fai lezada nia ulun dala ida ba iha armáriu. Maibé depoisde tribunál bolu lezada konfirma ho lezada nia asinatura no autus hafoin lezada konfirma faktu hotu ne'ebé hakerek iha akuzasaun.

Lezada akresenta tan katak antes ne'e sira iha problema bebeik no arguidu sempre baku lezada no mai hatan dala tolu iha tribunál no hetan ona desizaun¹. Relasiona ho kazu ida ne'e, lezada deklara katak laiha ema seluk mak haree tanba agresaun ne'e akontese iha sira nia kuartu laran. Agora dadaun, lezada ho arguidu dame malu ona no hela hamutuk iha uma ida no sira iha oan na'in rua. Lezada serbisu nu'udar funsionária kontratadu iha SEFOPE.

¹ Kazu tolu refere, JSMP mós halo monitorizasaun no publika ona iha SK sira antes.

Prokuradór apresenta pedidu ba tribunál no husu presinde tiha testemuña sira bazeia ba deklarasaun husi lezada katak iha momentu akontesimentu ne'e laiha ema seluk mak haree ho matan tanba agresaun ne'e akontese iha sira nia kuartu laran. Entretantu defeza laiha opsau no aseita ho prokuradór nia pedidu ne'e. Tribunál simu pedidu husi prokuradór no presinde tiha depoimentu husi testemuña sira.

Alegasaun final

Prokuradór komprova katak faktu sira ne'ebé hakerek ona iha akuzasaun ne'e provadu hotu bazeia ba konfirmasaun husi lezada perante tribunál no autus. Prokuradór hanoin katak arguidu nia hahalok ne'e repete fila-fila ona hasoru lezada no pior liutan iha produsaun ba prova arguidu hakarak hili direitu nonook hodi halo presau ba iha lezada atu la konfirma verdade ba faktu sira iha tribunál tanba sira dame malu ona. Tanba ne'e, prokuradór intende arguidu nia hahalok ne'e prenze duni elementu krime maus tratus ba kónjuje. Nune'e, husu ba tribunál atu kondena arguidu ho pena efetiva ba prizaun.

Entretantu defeza husu ba tribunál atu aplika pena ne'ebé justu ba arguidu ho konsiderasaun katak arguidu iha oan na'in rua no kuandu arguidu tama tiha komarka no se tan mak iha responsabilidade sustenta nia oan sira lor-loron. Arguidu hanesan dezempregadu no laiha rendimentu fixu kada fulan.

Desizaun

Tribunál prova katak arguidu tuda fatuk kona iha lezada nia kanotak parte loos no kona iha brasu parte loos. Tribunál mós prova katak arguidu uza nia liman loos habit lezada nia ulun no tuku dala ida iha ulun no fai lezada nia ulun ba iha armáriu. Arguidu kontinua tebe dala rua iha parte kidun no tuku dala ida iha kotuk laran no buti lezada dala ida ihaibun. Tribunál prova faktu hirak ne'e bazeia relatóriu médiku, fotografia no lezada nia deklarasaun ne'ebé konfirma faktu hotu iha akuzasaun. Tribunál intende katak arguidu halo agresaun fízika dala barak ona hasoru nia feen ka lezada no mai bebe'ik ona iha tribunál maibé arguidu nafatin la arrepende ninia hahalok ne'e. Tribunál konsidera arguidu halo agresaun hasoru fetu ne'ebé laiha forsa atu defende nia-an.

Bazeia ba prova no konsiderasaun ba sirkunstánsia sira ne'ebé haleu iha krime ne'e, tribunál konklui prosesu ne'e no kondena arguidu ho pena prizaun efetiva tinan haat.

4. Krime kontrabandu

Nú. Prosesu	: 0001/19.TDOEC
Kompozisaun Tribunál	: Koletivu
Juis	: Dr. Yudi Pamukas, Dr. Hugo da Cruz Pui no Dr. Evangelino Belo
Prokuradór	: Dr. Matias Soares
Defeza	: Dr. Marcelino Marques Coro

Desizaun

: Pena prizaun tinan 1 suspende ba tinan 1 fulan 6

Iha 02 Jullu 2020, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Vicente Ena hasoru Estadu RDTL, iha Suku Abani Subdistritu Pasabe, Distritu Oekusi.

Akuzasaun Prokuradór

Prokuradór akuza katak iha 26 Novembru 2014, maizumenus iha tuku 22:00 kalan, arguidu halo importasaun sasan hosi Indonezia tama mai territóriu Timor-Leste la liu husi Alfandega Timor-Leste nian nune'e la selu taxa ba Estadu RDTL. Sasan ilegál sira ne'e mak hanesan kalen taka uma tahan 15 no kada kalen tahan ida valor US\$3.00 ho total hamutuk osan US\$45.00.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak hatene kuandu hatama sasan ilegál hanesan ne'e la di'ak no kontra lei. Arguidu haktuir tan katak foin primeiravés halo krime no mai hatan iha tribunál. Arguidu arrepende ninia hahalok no promete sei la repete nia hahalok ne'e iha futuru. Arguidu deklara mós katak seidak selu taxa iha diresaun Alfandega no serbisu hanesan to'os na'in ne'ebé laiha rendimentu fixu kada fulan no arguidu iha oan na'in hitu.

Tribunál decide la rona ona testemuña husi Unidade Polísia Fronteira (UPF) nia depoimentu tanba arguidu konfesa faktu hotu ne'ebé prokuradór akuza.

Alegasaun finál

Prokuradór konsidera katak arguidu provadu komete krime kontrabandu tuir faktu sira ne'ebé hakerek ona iha akuzasaun no pior liutan mak arguidu hatene katak hatama sasan sein selu taxa ne'e kontra lei maibé nafatin halo. Prokuradór haktuir tan katak julgamentu ba kazu ne'e adia dala tolu to'o tribunál halo separasaun ba arguidu ho arguidu sira seluk tanba de'it arguidu la marka prezensa tuir notifikasaun ne'ebé iha ona antes. Ho konsiderasaun sira ne'e, husu ba tribunál atu kondena arguidu ho pena prizaun tinan rua fulan neen suspende ba tinan tolu no sasan sira ne'e bele monu ona ba Estadu RDTL.

Entretantu defeza husu ba tribunál atu aplika pena ne'ebé kmaan ba arguidu tanba arguidu konfesa, arrepende ona ninia hahalok no promete sei la repete ninia hahalok iha futuru. Defeza reforsa liu tan katak antes ne'e tribunál halo separasaun julgamentu ba arguidu nune'e la'os arguidu mak lakohi kumpri notifikasaun husi tribunál maibé julgamentu mak foin hala'o ba

arguidu. Arguidu mós hatudu kolaborasaun di'ak ho tribunál, iha oan na'in hitu no arguidu mak sustentadór ba iha nia família.

Desizaun

Depoisde avalia faktu sira hotu, tribunál prova katak arguidu hatama duni sasan ilegál la liu husi Alfandega nune'e la selu taxa ba Estadu RDTL. Sasan sira mak hanesan kalen taka uma tahan 15 no kada kalen tahan ida valor US\$3.00 ho total hamutuk osan US\$45.00. Tribunál tetu mós ba sirkunstánsia ne'ebé hakmaan arguidu katak arguidu foin primeiravés halo krime no mai hatan iha tribunál.

Bazeia ba faktu provadu sira refere no sirkunstánsia sira ne'ebé asociadu iha krime ne'e, tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

5. Krime kontrabandu

Nú. Prosesu : 0145/18.OESIC
Kompozisaun Tribunál : Koletivu
Juis : Dr. Yudi Pamukas, Dr. Hugo da Cruz Pui no Dr. Evangelino Belo
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 3 suspende ba tinan 3

Iha 02 Jullu 2020, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Dominicus Abi hasoru Estadu RDTL, iha Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 15 Agostu 2018, maizumenus iha tuku 21:30 kalan, arguidu halo importaun ba kareta ida ho modelu Kijang Pickup-Daihatsu ho valor osan Rp.63.800.00 husi Indonezia tama territóriu Timor-Leste ilegalmente. Arguidu hatama kareta ne'e iha área Noelekat no la liuhusi Alfandega hodi selu taxa ba Estadu RDTL. Arguidu prátika krime ne'e no disvia-an atu la selu taxa ba iha Diresaun Alfandega nune'e hamosu prejuizu ba Estadu.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak hatene kuandu hatama sasan ilegál ne'e kontra lei. Arguidu haktuir tan katak foin primeiravés halo krime no mai hatan iha tribunál, arrepende ninia hahalok no promete sei la repete nia hahalok ne'e iha futuro. Arguidu aumenta katak depoisde akontesimentu ne'e arguidu ho vontade rasik

atu selu kedas taxa maibé Alfandega rejenta no dehan ba arguidu katak depoisde julgamentu iha tribunál mak bele mai selu taxa. Arguidu serbisu iha ofisina iha Numbey ho rendimentu kada loron US\$25.00 no arguidu iha oan na'in tolu.

Tribunál decide la rona ona depoimentu testemuña hosi Unidade Polísia Fronteira (UPF) tanba arguidu konfesa faktu hotu ne'ebé prokuradór akuza.

Alegasaun final

Prokuradór konsidera arguidu provadu komete krime kontrabandu tuir faktu sira iha akuzasaun tanba iha produsaun ba prova arguidu konfesa faktu integralmente. Tanba ne'e, husu ba tribunál atu kondena arguidu tuir moldura penál iha artigu 316 KP atu arguidu la bele repete fali nia hahalok ne'e iha futuru no ema seluk la bele halo tuir, nune'e bele iha prevensaun jerál ba iha comunidade sira iha juridiksaun Oekusi.

Entretantu defeza husu ba tribunál atu fó pena ne'ebé adekua ba arguidu tanba arguidu konfesa ninia hahalok no antes tribunál halo julgamentu, arguidu tenta atu selu taxa ba Estadu liuhusi Alfandega maibé Alfandega rejenta no hakarak atu depoisde julgamentu mak bele ba selu taxa. Arguidu arrepende ninia hahalok, promete sei la repete tan nia hahalok iha futuru no arguidu iha oan na'in tolu ho rendimentu kada loron US\$25.00.

Desizaun

Tribunál prova katak arguidu halo importaun ba kareta ida ho modelu *Kijang* Pickup-Daihatsu ho valor osan Rp.63.800.00 husi Indonezia tama territóriu Timor-Leste ilegalmente iha área Noelekat. Tribunál konsidera katak arguidu prátika krime ne'e ho objetivu atu disviaan la selu taxa ba iha Diresaun Alfandega nune'e hamosu prejuizu ba Estadu.

Tanba ne'e, bazeia ba faktu provadu sira refere no sirkunstánsia hot-hotu ne'ebé asociadu iha krime ne'e, tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

6. Krime kontrabandu

Nú. Prosesu : 0165/17.OESIC
Kompozisaun Tribunál : Koletivu
Juis : Dr. Yudi Pamukas, Dr. Hugo da Cruz Pui no Dr. Evangelino Belo
Prokuradór : Dr. Matias Soares
Defeza : Dr. Marcelino Marques Coro
Desizaun : Pena prizaun tinan 3 suspende ba tinan 3 ba kada arguidu

Iha 03 Jullu 2020, Tribunál Distritál Oekusi prezide leitura akordaun ba krime kontrabandu ne'ebé envolve arguidu Jose da Cruz Tani no Marcelo Ole hasoru Estadu RDTL, iha Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 28 Agostu 2017, maizumenus iha oras tuku 23:42 kalan, arguidu sira hatama motorizada rua ho modelu motor *bebek* marka Supra ho ilegalmente husi Indonezia tama mai territóriu Timor-Leste liuhusi área Saben. Arguidu sira prátika krime ne'e ho objetivu atu disvia-an atu la selu taxa ba iha Diresaun Alfandega, nune'e hamosu prejuizu ba Estadu RDTL.

Prokuradór akuza arguidu sira kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Iha prosesu julgamentu, arguidu sira hili direitu atu la ko'alia ka nonook. Tribunál decide la rona ona depoimentu husi testemuña tanba testemuña muda ona ba fatin seluk nune'e kontinua ba iha alegasaun finál.

Alegasaun finál

Prokuradór konsidera katak mezmú iha produsaun ba prova arguidu sira hili direitu atu nonook maibé iha indisiu sira forte hatudu katak iha autus aprendidu ba motorizada rua ne'e no arguidu sira hakarak rasik hatama motorizada tanba sira lakohi atu selu taxa ba Estadu RDTL. Tanba ne'e, motorizada rua ne'e laiha dokumentu selu taxa, la rejistu iha Diresaun Nasionál Transporte no Terrestre (DNTT) no laiha xapa matrikula. Tanba ne'e, husu ba tribunál atu kondena arguidu sira ho pena prizaun tinan rua suspende ba tinan rua fulan neen.

Entretantu defeza husu ba tribunál atu fó pena ne'ebé adekuadu ba arguidu sira tuir sira nia sala mezmú iha produsaun ba prova arguidu sira hili direitu atu nonook.

Desizaun

Depoide avalia faktu hotu, tribunál prova katak arguidu sira hatama motorizada rua ho modelu *bebek* marka Supra ho ilegalmente husi Indonezia tama mai teritóriu Timor-Leste. Arguidu sira prátika krime ne'e ho objetivu atu desvia-an husi taxa nune'e hamosu prejuizu ba Estadu RDTL. Bazeia ba faktu provadu sira refere no sirkunstánsia sira hotu, tribunál kondena kada arguidu sira ho pena prizaun tinan tolu suspende ba tinan tolu.

7. Krime ofensa ba integridade física simples ho natureza violénsia doméstika

Nú. Prosesu : 0018/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout

Desizaun

: Pena prizaun tinan 1 suspende ba tinan 1

Iha 03 Jullu 2020, Tribunál Distritál Oekusi prezide julgamentu no imediata halo leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JdS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 05 Fevereiru 2019, maizumenus iha oras tuku 09:00 dadeer, arguidu tuku lezada dala lima iha kotuk laran, uza ai-pedasuk ida baku dala ida iha lezada nia liman sikun karuk, riba lezada ba rai no lori ain-tur hanehan lezada iha nia kakorok. Arguidu nia agresaun fíziku ne'e rezulta bubu, mean no sofre moras. Antes ne'e, arguidu haruka lezada atu suru etu iha sanan fó ba arguidu han maibé lezada haruka arguidu atu suru rasik iha sanan. Depoide akontesimentu ne'e lezada ba keixa iha polísia no kontinua ba halo tratamentu saúde iha Ospital Referal Oekusi no ospital refere kedas lezada ba iha Pradet.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun no deklarata katak nia hatene kuandu baku ema sei prejudika ema nia saúde fíziku no sofre moras ka kanek maibé arguidu nafatin halo. Mezmu nune'e, arguidu arrepende ninia hahalok no promete sei la halo tan hahalok hanesan hasoru lezada iha futuro. Arguidu hatutan katak depoide akontesimentu, arguidu ho lezada dame malu kedas no kontinua hela hamutuk to'o agora. Arguidu mós primeiravés halo krime hasoru lezada no mai hatan iha tribunál. Arguidu iha oan na'in rua no serbisu hanesan to'os na'in nune'e laiha rendimentu fixu kada fulan.

Aleinde ne'e, lezada kontinua konfirma faktu hotu iha akuzasaun no haktuir katak depoide akontesimentu ne'e sira na'in rua dame malu kedas no moris hamutuk nafatin to'o agora. Lezada haktuir tan katak to'o agora arguidu la halo ona agresaun fízika hasoru lezada.

Alegasaun finál

Prokuradór konsidera arguidu provadu halo agresaun fízika hasoru nia feen bazeia ba arguidu nia konfisaun. Prokuradór haktuir liutan katak tuir loloos arguidu mak tenke proteze lezada tanba lezada nu'udar feto no laiha forsa atu halo reasaun hasoru arguidu. Kazu la'en baku feen barak liu akontese iha Oekusi kompara ho munisípiu sira seluk. Bazeia ba konsiderasaun sira ne'e, husu ba tribunál atu kondena arguidu tuir moldura penál ne'ebé regula ona iha artigu 145 KP.

Enkuantu defeza haktuir katak arguidu konfesa intregalmente ba faktu sira iha akuzasaun, arrepende ninia hahalok, dame malu ona ho lezada, kolabora ho tribunál. Arguidu mós

promete sei la halo tan krime hasoru nia membru família ka ema seluk iha futuru. Bazeia ba sirkunstánsia sira ne'e hotu, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu tuku dala lima iha lezada nia kotuk laran, uza ai-pedasuk ida baku dala ida iha lezada nia liman sikun karuk, riba lezada ba rai no lori ain-tur hanehan lezada iha kakorok. Tribunál konsidera arguidu bele suru rasik etu la'os buat hotu hein lezada prepara hotu.

Bazeia ba prova sira ne'e no sirkunstánsia atenuante sira hanesan arguidu konfesa, arrepende ninia hahalok, dame malu ona ho lezada sira, foin primeiravés halo krime, iha oan na'in rua, arguidu serbisu hanesan to'os na'in no promete sei la repete ninia hahalok iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

8. Krime omisídiu negligente

Nú. Prosesu : 0001/20.OESTR
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Matias Soares
Defeza : Dr. Marcelino Marques Coro
Desizaun : Pena prizaun tinan 2 suspende ba tinan 2

Iha 07 Jullu 2020, Tribunál Distritál Oekusi prezide leitura sentensa ba krime omisídiu negligente ne'ebé envolve arguidu Ijaco Pandi da Silva hasoru lezada ANV (matebian), iha Suku Lalisuc Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 01 Janeiru 2020, maizumenus iha tuku 12:00 meiodia, arguidu kondús kareta pickup marka mitshubisi kór mutin ho xapa matrikula OE-10256, transporta koluna no tula ema balun atu ba tasiibun hodi selebra tinan foun hamutuk ho família sira. Hafoin halai to'o iha área Fatusene ih estrada kurva nian, derrepente arguidu rona buat ruma monu husi kareta no tarutu maka'as. Arguidu para tiha kareta no tun husi kareta, arguidu haree lezada mak monu husi kareta leten. Arguidu ko'us lezada no transporta kedas ba Ospitál Referal Oekusi maibé la konsege salva lezada nia vida. Kazu ne'e aneksu hamutuk ho relatóriu médiku husi Ospitál Referal Oekusi no fotografia husi polísia.

Prokuradór akuza arguidu kontra artigu 140 KP kona-ba omisídiu negligente ho moldura penál to'o tinan 4 ka multa.

Produsaun prova sira

Iha julgamentu, arguidu konfesa faktu hotu iha akuzasaun no deklara katak kuandu arguidu rona buat ruma tarutu, arguidu hapara kedas kareta no tun ba haree saida mak tarutu ne'e no haree lezada mak monu tun husi kareta leten. Ho nune'e arguidu ko'us lezada no transporta kedas ba iha ospital maibe la konsege salva lezada nia vida. Arguidu arrepende ninia hahalok no familia parte rua dame malu ona tuir kultura Timor nian tanba arguidu nia feen ho lezada nia inan nu'udar bin alin rasik. Arguidu hatutan katak iha momentu ne'eba nia halai ho velocidade 40 no ema na'in 5 tur iha kareta laran inklui arguidu rasik. Entretantu ema na'in 3 inklui lezada mak tur iha kareta kotuk hamutuk ho sasan hanesan koluna ida. Arguidu mos dehan katak iha prosesu funerál nian arguidu fo karau aman bo'ot ida inklui apoiu fos, masinmidar, kafe to'o hakohi lezada. Arguidu serbisu hanesan negosiante ki'ik ka'er makina dulas foos ho rendimentu kada fulan 50.00 no arguidu iha oan na'in haat.

Enkuantu testemuña JV nu'udar lezada nia aman depoimenta katak iha momentu ne'eba testemuña la sae tuir kareta no konfirma katak familia parte rua dame malu ona tuir kultura Timor nian no iha prosesu funerál arguidu fo karau aman bo'ot ida inklui apoiu fos, masinmidar no kafe. Testemuña mos hatutan katak arguidu no lezada sei iha relasaun familia tanba arguidu nia feen no lezada nia inan nu'udar bin ho alin rasik.

Entretantu testemuña MFN nu'udar arguidu nia feen hili direitu atu nonook ka lakohi atu fo nia depoimentu iha prosesu ne'e.

Hafoin rona tiha testemuña sira, tribunál decide atu hala'o kedas prosesu inspesaun judisiál iha fatin akontesimentu hodi konfirma arguidu nia deklarasaun ne'ebe dehan katak halai ho velocidade 40 no lezada monu iha kurva. Nune'e mos prokurador no defeza konkorda atu hala'o inspesaun ba lokal do krime. Depoisde halo inspesaun ba lokal do krime, tribunál konfirma katak lezada monu duni iha dalan kurva no arguidu halai duni ho velocidade 40 tanba distansia entre lezada monu no arguidu para kareta maizumenus metru 15.

Alegasaun final

Prokurador konsidera arguidu halai kareta la ho kuidadu nune'e to'o iha dalan kurva halo lezada monu tun husi kareta leten rezulta hakotu nia vida. Arguidu nia hahalok ne'e prene elementu krime omisidui negligente. Tanba ne'e, husu ba tribunál atu kondena arguidu ho pena prizaun tinan rua fulan neen maibe suspende ba tinan tolu.

Entretantu defeza husu ba tribunál atu aplika pena ne'ebe kmaan ba arguidu ho konsiderasaun katak arguidu iha kolaborasaun di'ak ho tribunál, konfesa faktu hotu iha akuzasaun no arrepende ona ba nia hahalok ne'e. Defeza reforsa liu tan katak depoisde akontesimentu ne'e, arguidu la hases-an maibe tula lezada ba ospital no maski nune'e la konsege salva lezada nia vida. Arguidu kontinua apoiu no fo sasan balun ba prosesu funerál to'o remata. Arguidu iha

oan na'in rua no arguidu mak iha responsabilidade tomak ba iha nia família ho rendimentu ne'ebé mínimu tebes.

Desizaun

Depoisde tetu faktu sira hotu, tribunál prova katak arguidu kondús kareta pickup no halai kareta la ho kuidadu tanba la fo hanoin ba ema sira iha kotuk atu tur ho kuidadu nune'e momentu to'o iha kurva lezada ne'ebé tur iha kuluna leten iha kareta kotuk monu tun ba rai. Arguidu transporta kedas lezada ba Ospital Referral Oekusi maibé la konsege salva lezada nia vida.

Bazeia ba prova sira no tetu ba sirkunstánsia atenuante sira hanesan arguidu konfesa, arrepende ninia hahalok, arguidu apoiu sasan to'o prosesu funerál hotu, dame malu ona ho lezada nia família sira, foin primeiravés halo krime, rendimentu kada fulan \$50.00 no arguidu iha oan na'in haat, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

9. Krime ofensa ba integridade física simples ho natureza violência doméstica

Nú. Prosesu : 0021/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun fulan 3 suspende ba tinan 1

Iha 08 Jullu 2020, Tribunál Distritál Oekusi prezide leitura sentensa ba krime ofensa ba integridade física simples ho natureza violência doméstica ne'ebé envolve arguidu JPM hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 11 Feveireiru 2019, maizumenus iha tuku 12:00 meiodia, arguidu tuku dala rua iha lezada nia kabaas parte loos kauza moras. Aktu ne'e akontese kuandu arguidu fila husi natar no lezada seidak tein hahan tanba lezada sei tein hela tua sabu. Kazu ne'e aneksa hamutuk ho relatóriu médiku husi Pradet ne'ebé antes ne'e lezada refere husi Ospital Referral Oekusi no fotografia husi polisia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Arguidu konfesa integralmente ba faktu sira iha akuzasaun no deklara katak arrepende ninia hahalok. Arguidu mós deklara katak dame malu ona ho lezada no moris hamutuk nafatin

hanesan feen ho la'en. Arguidu hatutan katak foin primeiravés halo krime, arguidu iha oan na'in tolu no serbisu hanesan to'os-na'in ne'ebé laiha rendimentu fixu kada fulan. Arguidu hatutan katak lezada ba duni iha ospital no toba kalan ida iha Uma-Mahon no iha aban mak arguidu ba tuir lezada lori fila ba iha sira nia uma.

Aleinde ne'e, lezada konfirma faktu hotu iha akuzasaun prokurador nian no deklarara katak sira dame malu kedas no arguidu foin primeiravés halo krime hasoru lezada. Lezada haktuir katak depoisde akontesimentu, lezada halo tratamentu saude iha ospital no toba kalan ida iha Uma-Mahon hafoin arguidu ba lori lezada ba sira nia uma.

Alegasaun final

Prokurador hanoin katak arguidu provadu halo agresaun fizika hasoru nia feen liuhusi tuku dala rua iha kabaas parte loos. Tanba ne'e, presiza iha prevensaun jerál atu evita arguidu repete nia hahalok iha futuro. Aleinde ne'e, tanba krime violensia domestikta akontese maka'as iha Rejiaun Oekusi kompara ho munisipiu sira seluk, nune'e husu ba tribunál atu kondena arguidu tuir pena iha artigu 145 KP.

Entretantu defeza husu ba tribunál atu fó pena ne'ebé kmaan ba arguidu tanba iha produsaun ba prova arguidu konfesa, arrepende ninia hahalok no di'ak malu ona ho lezada. Arguidu mós foin primeiravés mai hatan iha tribunál, kolabora di'ak ho tribunál no arguidu iha oan na'in tolu ne'ebé arguidu mak responsabiliza.

Desizaun

Depoisde tetu faktu sira hotu, tribunál prova katak arguidu tuku lezada dala rua iha kabas parte loos. Tribunál konsidera arguidu la pasensia no tuir loloos arguidu mós iha liman para bele tein rasik kuandu lezada seidak tein tanba lezada sei tein hela tua.

Bazeia ba prova sira ne'e no tetu sirkunstansia atenuante sira hanesan arguidu konfesa, arrepende ninia hahalok, dame malu ona ho lezada, foin primeiravés halo krime, laiha rendimentu fixu kada fulan no promete katak sei la repete ninia hahalok iha futuro, nune'e tribunál konklui prosesu ne'e no kondena arguidu ho pena prizaun fulan tolu suspende nia ezekusaun ba tinan ida.

10. Krime koasaun seksuál no ofensa ba integridade fizika simples ho natureza violensia domestikta

Nú. Prosesu : 0191/18.OESIC
Kompozisaun Tribunál : Koletivu
Juis : Dr. Yudi Pamunkas, Dr. Hugo da Cruz Pui no
Dr. Evangelino Belo
Prokurador : Dr. Matias Soares

Defeza : Dr. Marcelino Marques Coro
Desizaun : Pena prizaun tinan 3 suspende ba tinan 3 no absolve

Iha 08 Jullu 2020, Tribunál Distritál Oekusi prezide leitura akordaun ba krime koasaun seksuál no krime ofensa ba integridade fízika simples ho natureza violénsia doméstika ne'ebé envolve arguidu PT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 26 Outubru 2018, maizumenus iha oras tuku 13:00 meiodia, arguidu fila ba uma no hako'ak metin lezada, riba lezada ba rai hodi kolu lezada nia roupa no obriga atu halo relasaun seksuál ho lezada iha liur perante iha uma oin. Hafoin arguidu tata lezada nia tilun parte loos kauza kanek nakles, ran no sofre moras. Arguidu ninia hahalok ne'e halo lezada sente moe ho viziñu sira. Kazu ne'e aneksa hamutuk ho relatóriu médiku husi Pradet no fotografia husi polísia.

Prokuradór akuza arguidu kontra artigu 171 KP kona-ba krime koasaun seksuál ho moldura penál tinan 2 to'o tinan 8 prizaun. Prokuradór mós akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu hili direitu nonook. Entretantu lezada kontinua konfirma faktu sira iha akuzasaun katak lezada suru hela tais no la hatene arguidu fila husi ne'ebé, to'o uma no halimar duni malu ho sira nia oan sira. Hafoin lezada hateten ba arguidu katak imi hakarak duni malu halimar ho labarik sira, di'ak liu sai husi fatin ne'e. Arguidu husik tiha duni malu ne'e no direitamente ka'er lezada nia hirus-matan maibé lezada la sente buat ida tanba sira hanesan feen-laen.

Lezada hatutan katak depoisde ida ne'e, arguidu hako'ak metin lezada dada sai ba iha liur perante iha uma nia oin no arguidu hatete ba lezada katak atu halo relasaun seksuál iha liur de'it naran katak halo ho feen. Depois sira kontinua hako'ak malu ho pozisaun hamrik hela no arguidu obriga kolu lezada nia faru no lipa hela de'it kalsa. Maibé lezada rejeita no dada sae fali nia lipa. Hafoin ne'e, arguidu tata lezada nia tilun parte loos to'o nakles no kanek. Lezada haktuir tan katak komesa iha inísiu Outubru, arguidu ho lezada la halo ona relasaun seksuál tanba lezada lakohi ona atu kous oan tanba sira iha ona oan hamutuk na'in ualu. Lezada dehan tan katak depoisde akontesimentu ne'e, arguidu ho lezada separadu to'o agora tanba lezada lakohi ona atu ko'us tan oan. Aleinde ne'e, arguidu sempre baku hela de'it lezada.

Alegasaun finál

Prokuradór konsidera mezmú arguidu hili direitu nonook maibé aktu sira ne'e provadu bazeia ba lezada nia deklarasaun perante iha produsaun ba prova. Tanba ne'e, arguidu nia konduta

ne'e prenze duni elementu krime koasaun seksuál no ofensa ba integridade fízika simples ho natureza violénsia doméstika. Tanba ne'e, husu ba tribunál koletivu atu kondena arguidu ho pena prizaun tinan lima fulan neen.

Entretantu defeza husu ba tribunál koletivu atu fó justisa ba arguidu tuir sala ne'ebé arguidu halo ho konsiderasaun sira hanesan arguidu iha kolaborasaun di'ak ho tribunál, arguidu arrepende ninia hahalok, iha oan na'in ualu, seidak dame malu tanba lezada ho arguidu moris separadu ona no arguidu laiha rendimentu fixu tanba serbisu hanesan to'os na'in.

Desizaun

Depoide avalia faktu sira hotu, tribunál prova katak arguidu hako'ak metin lezada no tenta kolu lezada nia roupa no ho maneira atu halo relasaun seksuál ho lezada iha liur perante iha uma oin. Nune'e, tribunál konsidera arguidu iha intensaun atu halo moe de'it lezada ba iha nia viziñu sira publikamente. Tribunál mós prova katak arguidu tata lezada nia tilun. Tanba ne'e, tribunál konsidera arguidu provadu komete krime ofensa ba integridade fízika simples ho natureza violénsia doméstika maibé tribunál la prova arguidu komete krime koasaun seksuál tanba arguidu laiha intensaun atu halo relasaun seksuál ho lezada iha uma oin maibé apenas atu halo moe de'it lezada. Aktu hirak ne'e hotu hatudu katak arguidu la respeita lezada nu'udar nia feen no arguidu nia hahalok ne'e konsidera hanesan dolu direitu.

Bazeia ba prova sira ne'e no tetu sirkunstánsia sira hotu, nune'e tribunál konklui prosesu ne'e no kondena arguidu ho pena prizaun tinan tolu suspende nia ezekusaun ba tinan tolu ba krime ofensa ba integridade fízika simples ho natureza violénsia doméstika no absolve arguidu husi krime koasaun seksuál tanba arguidu laiha intensaun atu halo relasaun seksuál iha uma oin maibé atu halo moe lezada.

11. Krime ofensa ba integridade fízika simples ho natureza violénsia doméstika

Nú. Prosesu : 0025/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista Aleixo Dos Santos
Defeza : Dr. Marcelino Marques Coro
Desizaun : Pena prizaun fulan 9 suspende ba tinan 1 fulan 6

Iha 15 Jullu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SU hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 16 Fevereiru 2019, maizumenus iha oras tuku 18:00 lokraik, arguidu uza fiu eletrisidade no baku dala tolu iha lezada nia parte kidun kauza bubu, mean no

moras. Arguidu mós basa dala rua iha hasan parte loos kauza moras. Aktu sira ne'e akontese kuandu arguidu hare lezada halimar ka joga bingo. Kazu ne'e aneksa hamutuk ho relatóriu médiku husi Pradet ne'ebé antes ne'e lezada refere husi Ospital Referral Oekusi-Pradet no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 husi LKVD.

Produsaun prova sira

Iha julgamentu, arguidu konfesa faktu hotu iha akuzasaun no deklara katak nia hatene kuandu baku ema sei prejudika ema nia saúde fíziku no sofre moras ka kanek maibé arguidu nafatin halo. Mezmu nune'e, arguidu arrepende ninia hahalok no promete sei la halo tan hahalok hanesan hasoru lezada iha futuro. Arguidu deklara tan katak sira dame malu depoisde akontesimentu no kontinua hela hamutuk to'o agora. Arguidu mós foin primeiravés halo krime hasoru lezada no mai hatan iha tribunál. Arguidu iha oan na'in lima ho rendimentu kada fulan US\$35.00 tanba arguidu serbisu hanesan tesi no fera-ai hodi faan iha Oekusi-vila.

Aleinde ne'e, lezada kontinua konfirma faktu hotu iha akuzasaun no deklara katak depoisde akontesimentu ne'e, sira di'ak malu to'o agora.

Alegasaun final

Prokuradór konsidera arguidu provadu halo agresaun fízika hasoru nia feen bazeia ba arguidu nia konfisaun. Baku no basa la'os maneiru ne'ebé di'ak atu eduka ema seluk tanba maneira ne'e bele prejudika ema nia kondisaun fíziku. Bazeia ba razaun sira ne'e, husu ba tribunál atu kondena arguidu ho pena prizaun tinan ida suspende ba tinan ida.

Enkuantu defeza haktuir katak arguidu konfesa intregalmente ba faktu sira iha akuzasaun, arrepende ninia hahalok, dame malu ona ho lezada no kolabora di'ak ho tribunál. Arguidu mós promete sei la halo tan krime hasoru nia membru família ka ema seluk iha futuro no arguidu mak iha responsabilidade ba nia oan na'in lima inklui lezada rasik. Bazeia ba sirkunstánsia sira ne'e hotu, husu ba tribunál atu aplika pena ne'ebé kmaan ba arguidu.

Desizaun

Tribunál prova katak arguidu baku lezada dala tolu uza fiu eletrisidade no basa dala rua iha hasan parte loos. Arguidu ninia hahalok ne'e, iha duni intensaun atu halo krime hasoru nia feen ne'ebé tuir loloos arguidu mak tenke fó protesau. Tribunál tetu mós sirkunstánsia atenuante sira hanesan arguidu arrepende ona ninia hahalok, iha oan na'in lima, foin primeiravés mai iha tribunál no dame malu ona ho lezada. Nune'e, bazeia ba faktu provadu sira no sirkunstánsia sira ne'e, tribunál kondena arguidu ho pena prizaun fulan sia maibé suspende nia ezekusaun ba períodu tinan ida fulan neen.

12. Krime ofensa ba integridade fízika simples ho natureza violénsia doméstika

Nú. Prosesu : 0032/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun fulan 9 suspende ba tinan 1 fulan 6

Iha 15 Jullu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ECB hasoru nia feen segundu, iha Distritu Oekusi.

Akuzasaun Prokuradór

Prokuradór akuza katak iha 23 Feveireiru 2019, maizumenus iha tuku 17:00 lokraik, arguidu buti dala ida iha lezada nia ibun no buti dala ida iha kakorok kauza kanek kois iha kakorok no sofre moras. Aktu sira ne'e akontese bainhira arguidu haree sira nia oan tanis. Depoisde akontesimentu ne'e, lezada ba halo tratamentu saúde iha Ospitál Referral Oekusi no ospitál refere lezada ba iha Pradet no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira hotu iha akuzasaun no deklarata katak arrepende ninia hahalok. Arguidu mós deklarata katak seidak di'ak malu no moris ketak-ketak ho lezada to'o agora. Arguidu foin primeiravés halo krime hasoru lezada no mai hatan iha tribunál. Arguidu serbisu nu'udar Jestór Postu Administrativu Pante-makasar ho rendimentu kada fulan US\$512.00 no iha oan hamutuk na'in neen.

Nune'e mós lezada kontinua konfirma faktu hotu iha akuzasaun no deklarata katak depoisde akontesimentu ne'e to'o agora sira seidak dame no sira iha ona oan na'in ida.

Alegasaun finál

Prokuradór konsidera arguidu provadu komete krime hasoru lezada tuir faktu sira iha akuzasaun bazeia ba arguidu nia konfisaun no lezada nia konfirmasaun. Haree ba realidade katak krime violénsia doméstika akontese barak liu iha Rejiaun Oekusi kompara ho munisípiu sira seluk, nune'e husu ba tribunál atu kondena arguidu tuir moldura penál ne'ebé deskreve ona ba krime ne'ebé akuza ba arguidu.

Entretantu, defeza husu ba tribunál atu kondena arguidu ho pena ne'ebé kmaan tanba arguidu konfesa hotu faktu sira, arrepende ninia hahalok no kolabora di'ak ho tribunál. Arguidu mak iha responsabilidade ba iha nia família no fo'in primeiravés halo krime hasoru lezada no mai hatan iha tribunál.

Desizaun

Tribunál prova katak arguidu buti dala ida iha lezada nia ibun no buti dala ida iha kakorok. Tanba ne'e, arguidu provadu halo duni agresaun fízika hasoru lezada. Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ona ninia hahalok, iha oan na'in neen, foin primeiravés mai iha tribunál, nune'e tribunál kondena arguidu ho pena prizaun fulan sia maibé suspende ba tinan ida fulan neen.

13. Krime ofensa ba integridade fízika simples ho natureza violénsia doméstika

Nú. Prosesu : 0063/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 1 suspende ba tinan 1 fulan 6

Iha 16 Jullu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 05 Maiu 2019, maizumenus iha tuku 20:00 kalan, arguidu tebe dala ida iha lezada nia kotuk laran no basa dala rua iha hasan loos. Aktu sira ne'e rezulta moras iha kotuk laran no hasan loos. Arguidu mós tata lezada nia liman fuan parte karuk no rasta iha rai kauza kanek kois iha liman no ain-tur. Antes ne'e, arguidu ho lezada fila hamutuk atu ba iha sira nia uma no to'o iha dalan klaran, lezada fila uluk ba uma no la hein arguidu ne'ebé sei la'o ikus. Ho nune'e, mosu agresaun hirak ne'e. Hafoin akontesimentu ne'e, lezada ba halo tratamentu médiku iha Ospítal Referal Oekusi no refere lezada ba iha Pradet no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(d), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun no deklara katak arrepende ninia hahalok. Arguidu mós deklara katak foin primeiravés halo krime no mai hatan iha tribunál no promete sei la halo tan agresaun ruma hasoru lezada. Arguidu hatutan katak serbisu nu'udar natar na'in laiha rendimentu fixu kada fulan, oan na'in haat no depoisde akontesimentu arguidu ho lezada di'ak malu to'o agora.

Aleinde ne'e, lezada kontinua konfirma faktu sira iha akuzasaun no deklara katak arguidu foin primeiravés halo agresaun hasoru lezada. Lezada mós deklara katak sira dame malu ona to'o agora.

Alegasaun final

Prokuradór konsidera arguidu provadu prátika krime tuir faktu sira iha akuzasaun no konsidera arguidu ninia hahalok ne'e hatudu katak arguidu laiha respeita ba lezada nu'udar feen. Tanba ne'e, husu ba tribunál atu kondena arguidu tuir moldura penál iha artigu 145 KP.

Entretantu defeza husu ba tribunál atu kondena arguidu ho pena ne'ebé adekuaudu tanba arguidu konfesa hotu faktu sira, arrepende ona ninia hahalok no promete sei la halo tan krime hasoru lezada iha futuro. Arguidu mós foin primeiravés halo krime no mai hatan iha tribunál, dame malu ona no iha oan na'in haat.

Desizaun

Depoisde avalia faktu sira ne'ebé prodús durante julgamentu, tribunál prova katak arguidu tebe dala ida iha lezada nia kotuk laran no basa dala rua iha hasan loos. Tribunál mós prova katak arguidu tata lezada nia liman fuan parte karuk no rasta lezada iha rai. Arguidu nia hahalok ne'e konsidera hanesan dolu direitu tanba arguidu hakarak atu halo agresaun no ikus mai halo duni.

Bazeia ba faktu provadu sira no tetu ba sirkunstánsia sira hanesan arguidu konfesa, arrepende ona ninia hahalok, iha oan na'in haat, foin primeiravés halo krime no mai hatan iha tribunál, nune'e tribunál kondena arguidu ho pena prizaun tinan ida suspende ba tinan ida fulan neen.

14. Krime ofensa ba integridade física negligente

Nú. Prosesu : 0009/18.OESTR
Kompozisaun Tribunál : Singulár
Juis : Dr. Eusebio Xavier Victor
Prokuradór : Dr. Matias Soares
Defeza : Dr. Calisto Tout
Desizaun : Omologa pedidu dezisténsia keixa

Iha 09 Jullu 2020, Tribunál Distritál Oekusi prezide julgamentu tentativa konsiliaun ba krime ofensa ba integridade fízika neglijente ne'ebé envolve arguidu JSN hasoru lezadu (LA) ho kondisaun alezadu fíziku tomak, iha Suku Costa, Sub-ditritu Pante-makasar, Distritu Oekusi.

Akuzasaun Prokuradór

Prokuradór akuza katak iha 28 Juñu 2018, maizumenus iha tuku 20:30 kalan, arguidu kondús kareta ida ho marka *Kijang* Hilux ho xapa matrikula OE-10-830 TL. Arguidu sai husi uma atu ba hola sasan iha loja Padimau/ka Loja Cina-au. Iha momentu to'o iha loja oin, arguidu para tiha kareta no tama hola sasan, lezadu duir hela iha kareta nia kotuk. Depoide hola tiha sasan, arguidu sai fali kareta no atu hakiduk kareta fila ba uma. Momentu hakiduk ne'e mak kareta kose lezadu nia liman parte loos rezulta lezadu monu ba kotuk no kauza lezadu nia liman kanek kois no sofre moras iha kotuk laran. Arguidu tula kedas lezadu lori ba halo tratamentu saúde iha Ospital Referral Oekusi no alta kedas iha kalan ne'e.

Prokuradór akuza arguidu kontra artigu 148 KP kona-ba ofensa ba integridade fízika neglijente ho moldura penál mínimu loron 30 prizaun no máximu tinan 1 prizaun ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, antes tama ba prosesu produsaun ba prova sira, juis husu ba parte sira atu halo tentativa konsiliaun.

Iha prosesu tentativa konsiliaun ne'e, lezadu ne'ebé representa husi nia família (LAS) deklara katak hakarak deziste tiha keixa hasoru arguidu tanba sira na'in rua dame malu ona no depoide akontesimentu mós arguidu tula lezadu lori ba iha ospital hodi halo tratamentu no liutiha minutu balun lezadu fila ba uma.

Alegasaun finál

Prokuradór no defeza konkorda ho parte rua nia akordu ne'e no husu ba tribunál atu omologa prosesu ne'e.

Desizaun

Bazeia ba akordu husi parte sira no pedidu dezisténsia husi lezadu ne'ebé representa husi nia família, tribunál konklui no omologa ba pedidu dezisténsia keixa ne'e.

15. Krime ofensa ba integridade fízika simples ho natureza violénsia doméstika

Nú. Prosesu : 0054/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi

Defeza : Dr. Marcelino Marques Coro
Desizaun : Pena prizaun fulan 6 suspende ba tinan 1

Iha 16 Jullu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CSF hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 13 Abril 2019, maizumenus iha tuku 16:00 lokraik, arguidu tuku dala ida iha lezada nia hasan parte loos no buti dala ida iha kakorok kauza bubu, mean no moras. Aktu ne'e akontese kuandu arguidu atu ba nia inan-aman sira nia uma no lezada bolu tuir arguidu atu lori ho sira nia oan. Kazu ne'e aneksa hamutuk ho relatóriu médiku husi Ospital referral Oekusi no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun no deklara katak arrepende ninia hahalok. Arguidu mós deklara katak foin primeiravés halo krime no mai hatan iha tribunál no mós promete sei la halo tan agresaun ruma hasoru lezada. Depoisde akontesimentu ne'e arguidu ho lezada dame malu kedas no iha oan na'in rua. Arguidu hatutan katak nia nu'udar badaen fatuk ho rendimentu kada fulan US\$50.00 maibé depende ba ema persija.

Nune'e mós lezada kontinua konfirma faktu sira iha akuzasaun no deklara katak depoisde akontesimentu lezada ba halo tratamentu iha ospital no fila kedas ba iha uma, dame malu ho arguidu to'o agora arguidu la baku tan ona lezada.

Alegasaun final

Prokuradór konsidera arguidu provadu prátika krime tuir faktu sira iha akuzasaun no konsidera arguidu ninia hahalok ne'e hatudu katak arguidu la respeita lezada nu'udar nia feen ne'ebé loron-kalan prepara hahan ba arguidu. Tanba ne'e, husu ba tribunál atu kondena arguidu tuir moldura penál iha artigu 145 KP.

Entretantu defeza husu ba tribunál atu kondena arguidu ho pena ne'ebé kmaan tanba arguidu konfesa integralmente ba faktu sira, arrepende ona ninia hahalok no promete sei la halo tan krime hasoru lezada iha futuro. Arguidu mós foin primeiravés halo krime no mai hatan iha tribunál no iha oan na'in rua.

Desizaun

Tribunál prova katak arguidu provadu tuku dala ida iha lezadu nia hasan parte loos no buti dala ida iha kakorok. Arguidu nia hahalok ne'e iha duni intensaun atu halo krime hasoru nia feen ne'ebé tuir loloos arguidu mak tenke fó protesau.

Bazeia ba faktu provadu sira no tetu ba sirkunstánsia sira hanesan arguidu konfesa, arrepende ninia hahalok, di'ak malu ona ho lezada, iha oan na'in rua no foin primeiravés mai iha tribunál, tribunál konklui prosesu ne'e no kondena arguidu ho pena prizaun fulan neen suspende tinan ida.

16. Krime ofensa ba integridade física simples ho natureza violénsia doméstika

Nú. Prosesu : 0086/19.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena multa US\$100.00

Iha 20 Jullu 2020, Tribunál Distritál Oekusi prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 08 Juñu 2019, maizumenus iha tuku 19:00 kalan, arguidu tebe dala rua iha lezada nia kanotak parte loos kauza moras. Arguidu mós lori katana nia belar baku ba lezada nia ulun maibé kona iha kapasete tanba lezada uza hela kapasete. Aktu ne'e akontese bainhira lezada husu ba arguidu kona-ba fetu ne'ebé ko'alia ba lezada katak nia grávida ka isin rua husi arguidu. Kazu ne'e aneksu hamutuk ho relatóriu médiku husi Ospital Referral Oekusi no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Arguidu konfesa integralmente ba faktu hotu iha akuzasaun no deklara katak arrepende ninia hahalok. Arguidu mós deklara katak dame malu ona ho lezada no moris hamutuk nafatin hanesan feen ho la'en. Arguidu foin primeiravés halo krime mai hatan iha tribunál no serbisu hanesan Polísia-UPF ho rendimentu kada fulan US\$265.00 no arguidu seidak iha oan. Arguidu hatutan katak lezada ba halo tratamentu iha ospital no arguidu tuir ba lori fila lezada ba iha sira nia uma.

Aleinde ne'e, lezada mós kontinua konfirma faktu hotu iha akuzasaun prokuradór nian no deklara katak depoisde akontesimentu ne'e sira dame malu kedas. Lezada haktuir tan katak arguidu foin primeiravés halo krime hasoru lezada no momentu lezada halo tratamentu saúde iha ospital arguidu ba no lori fila lezada ba sira nia uma.

Alegasaun final

Prokuradór konsidera arguidu provadu halo agresauñ fízika hasoru nia feen tuir faktu sira iha akuzasaun, Tanba ne'e, presiza iha prevensaun jerál atu evita arguidu la repete ninia hahalok iha futuro. Aleinde ne'e, tanba krime violénsia doméstika maioria akontese maka'as iha Rejiaun Oekusi kompara ho munisípiu sira seluk, nune'e husu ba tribunál atu kondena arguidu tuir pena ne'ebé hakerek ona iha artigu 145 KP.

Entretantu defeza husu ba tribunál atu fó pena ne'ebé kmaan ba arguidu tanba iha produsaun ba prova arguidu konfesa, arrepende ninia hahalok no di'ak malu ona ho lezada. Arguidu mós foin primeiravés mai hatan iha tribunál, kolabora di'ak ho tribunál no arguidu promete sei la repete tan nia hahalok hirak ne'e iha futuro.

Desizaun

Depoisde avalia faktu sira durante prosesu julgamentu, tribunál prova katak arguidu tebe dala rua iha lezada nia kanotak parte loos no lori katana nia belar baku ba lezada nia ulun no kona iha kapasete. Tribunál tetu mós katak arguidu konfesa, arrepende ninia hahalok, foin primeiravés halo krime, serbisu hanesan polísia no promete ona katak sei la repete fali nia hahalok iha futuro. Tanba ne'e, tribunál konklui prosesu ne'e no kondena arguidu ho pena multa US\$100.00 no kada loron arguidu sei selu US\$1.00 durante loron 100. Bainhira arguidu la selu pena multa ne'e, arguidu sei kumpri iha prizaun durante loron 90 nu'udar pena alternativa.

17. Krime ofensa ba integridade fízika simples ho natureza violénsia doméstika

Nú. Prosesu : 0037/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista
Defeza : Dr. Marcelino Marques Coro
Desizaun : Pena prizaun fulan 9 suspende ba tinan 1

Iha 22 Jullu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 18 Marsu 2019, maizumenus iha oras tuku 19:00 kalan, arguidu uza fiu eletresidade no baku dala tolu iha lezada nia kotuk laran kauza moras no bubu. Arguidu mós tuku lezada dala ida iha kanuruk kauza moras. Aktu ne'e akontese kuandu arguidu ho lezada diskute malu kona-ba osan ne'ebé arguidu la fô ba lezada kaer. Kazu ne'e aneksa hamutuk ho relatóriu médiku husi Ospital Referral Oekusi no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun no deklara katak arrepende ninia hahalok. Arguidu mós deklara katak foin primeiravés halo krime no mai hatan iha tribunál no mós promete sei la halo tan agresaun ruma hasoru lezada. Arguidu hatutan katak depoisde akontesimentu, sira moris keta-ketak tanba lezada lakohi ona atu moris hamutuk ho arguidu mezmu antes julgamentu arguidu tenta atu dame ho lezada. Arguidu mós dehan katak sira iha oan na'in haat, arguidu nu'udar kondutór mikrolete ho rendimentu kada fulan US\$150.00.

Aleinde ne'e, lezada kontinua konfirma faktu sira hotu iha akuzasaun no deklara katak depoisde fila husi tratamentu iha ospital, lezada fila ba iha nia inan-aman sira nia uma to'o agora tanba lezada lakohi ona atu moris hamutuk ho arguidu. Lezada akresenta liu tan katak sira hola malu iha tinan 1992 no arguidu sempre halo agresaun fízika hasoru lezada.

Alegasaun finál

Prokuradór konsidera arguidu provadu prátika krime tuir faktu sira iha akuzasaun no konsidera arguidu ninia hahalok ne'e hatudu katak arguidu la respeita lezada nu'udar nia feen ne'ebé loron-kalan prepara hahan ba arguidu. Arguidu ninia hahalok ne'ebé sempre halo agresaun hasoru lezada nune'e lezada deside lakohi ona atu moris hamutuk ho arguidu. Tanba ne'e, husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza husu ba tribunál atu kondena arguidu ho pena ne'ebé kmaan tanba arguidu konfesa integralmente ba faktu sira, arrepende ona ninia hahalok no promete sei la halo tan krime hasoru lezada iha futuru. Arguidu mós foin primeiravés halo krime no mai hatan iha tribunál no iha oan na'in haat. Defeza reforsa tan katak arguidu tenta bebeik atu dame malu ho lezada maibé lezada rejeita.

Desizaun

Tribunál prova katak arguidu uza fiu elektrisiade no baku dala tolu iha lezada nia kotuk laran no ho liman tuku dala ida iha kanuruk. Bazeia ba faktu provadu sira no sirkunstánsia atenuante sira hanesan arguidu konfesa, arrepende ninia hahalok, foin primeiravés halo krime mai hatan iha tribunál, oan na'in haat, nune'e tribunál konklui prosesu ne'e no kondena arguidu ho pena prizaun fulan sia suspende ba tinan ida.

18. Krime ofensa ba integridade fízika simples ho natureza violénsia doméstika

Nú. Prosesu : 0134/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun fulan 9 suspende ba tinan 1

Iha 23 Jullu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DE hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 10 Setembru 2019, maizumenus iha tuku 12:00 meiodia, arguidu fila ba uma husi seremonia kulturál ho kondisaun lanu. Lezada tur hela no arguidu husi lezada nia kotuk no tebe dala ida iha lezada nia ibun rezulta nehan rua nakdoko no ran. Arguidu foti kadeira masa ida no baku dala ida iha iha lezada nia ulun parte loos rezulta kanek ki'ik. Arguidu mós tebe dala ida iha lezada nia kotuk laran rezulta moras no tuku dala ida iha matan okos parte loos rezulta bubu. Kazu ne'e aneksu hamutuk ho relatóriu médiku husi Pradet no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós deklarata katak depoisde akontesimentu ne'e sira di'ak malu kedas to'o agora. Arguidu hatutan katak foin primeiravés halo krime no mai hatan iha tribunál, serbisu hanesan to'os na'in nune'e laiha rendimentu fixu kada fulan no iha oan na'in haat. Arguidu deklarata tan katak lezada ba hala'o tratamentu iha ospital liu loron rua mak fila ba iha uma.

Nune'e mós lezada kontinua konfirma faktu hotu iha akuzasaun prokuradór no konfirma mós ho deklarasaun arguidu nian katak liutiha lora rua mak lezada fila husi ospital no di'ak malu to'o agora.

Alegasaun final

Prokuradór konsidera arguidu provadu halo agresaun fizika hasoru nia feen tuir faktu sira iha akuzasaun no arguidu nia aksaun ne'e hasoru fetu ne'ebé laiha forsa atu halo reasaun hasoru arguidu. Prokuradór reforsa liutan katak krime violénsia doméstika maioria akontese iha Rejiaun Oekusi kompara ho munisípiu sira seluk. Tanba ne'e, atu halo prevensaun iha futuro, husu ba tribunál atu kondena arguidu ho pena ne'ebé previstu iha artigu 145 KP.

Entretantu, defeza husu ba tribunál atu aplika pena ne'ebé adekua ba arguidu ho konsiderasaun sira katak arguidu deklarasaun ho onestu halo duni agresaun fizika hasoru lezada tuir faktu sira hotu iha akuzasaun. Aleinde ne'e, arguidu kolabora di'ak ho tribunál, arrepende ona ninia hahalok no foin primeiravés halo krime no mai hatan iha tribunál. Arguidu mós iha oan na'in haat, arguidu mak iha responsabilidade tomak ba iha família no serbisu hanesan to'os na'in ne'ebé laiha rendimentu fixu kada fulan.

Desizaun

Tribunál prova katak arguidu ho kondisaun lanu no tebe dala ida iha lezada nia ibun. Tribunál mós prova katak arguidu uza kadeira masa ida no baku lezada dala ida iha ulun parte loos, tebe dala ida iha kotuk laran no tuku dala ida iha matan okos parte loos. Arguidu halo agresaun fizika dala barak hasoru lezada nune'e konsidera dolu direitu.

Tribunál mós tetu katak durante iha produsaun ba prova arguidu konfesa faktu hotu, kolabora diak, arrepende ona ba nia hahalok, di'ak malu ona ho lezada no moris hamutuk nafatin hanesan feen ho la'en ate agora. Arguidu mós foin primeiravés halo krime mai hatan iha tribunál, serbisu hanesan to'os na'in nune'e laiha rendimentu fixu kada fulan no arguidu iha oan na'in haat. Bazeia ba prova hirak ne'e no tetu ba sirkunstánsia atenuante sira refere, nune'e tribunál konklui prosesu ne'e no kondena arguidu ho pena prizaun fulan sia suspende ba tinan ida.

19. Krime ofensa ba integridade fizika simples

Nú. Prosesu	: 0020/18.OEPSB
Kompozisaun Tribunál	: Singulár
Juis	: Dr. Eusebio Xavier Victor
Prokuradór	: Dr. Mateus Nesi
Defeza	: Dr. Calisto Tout
Desizaun	: Omologa pedidu dezisténsia keixa

Iha 24 Jullu 2020, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Adelaide da Cruz Elu no Antonio Falo hasoru lezadu Antonio Sila, iha Suku Abani, Sub-distritu Pasabe, Distritu Oekusi.

Akuzasaun Prokuradór

Prokuradór akuza katak iha 27 Outubru 2018, maizumenus iha oras tuku 12:30 meiudia, arguidu Adelaide tuku lezadu dala ida iha kanuruk kauza moras no bubu. Depoisde ne'e, arguidu hako'ak metin lezadu hodi arguidu Antonio Falo tebe dala rua iha lezada nia kelen loos no tuku dala tolu iha kotuk laran rezulta mean no bubu. Aktu ne'e akontese kuandu arguidu na'in rua no lezadu iha kondisaun lanu no sira diskute malu.

Prokuradór akuza arguidu sira kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira no lezadu.

Iha prosesu konsiliaun ne'e, lezadu hakarak dame malu de'it sein kondisaun no dada fali nia-keixa hasoru arguidu na'in rua. Arguidu sira mós konkorda ho pedidu dame malu husi lezadu. Nune'e, lezadu husu ba tribunál atu deziste ninia-keixa hasoru arguidu na'in rua.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezadu, tribunál konklui prosesu ne'e no omologa akordu dame entre parte sira.

20. Krime ofensa ba integridade fízika simples ho natureza violénsia doméstika

Nú. Prosesu	: 0043/19.OEPMK
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Mateus Nesi
Defeza	: Dr. Calisto Tout
Desizaun	: Pena prizaun fulan 3 suspende ba tinan 1

Iha 27 Jullu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PdS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 06 Outubru 2019, maizumenus iha tuku 17:30 lokraik, arguidu basa lezada dala ida iha hasan loos. Hafoin arguidu hasai kapasete husi nia ulun no uza kapasete ne'e baku dala ida iha lezada nia matan okos parte loos. Aktu sira ne'e, rezulta lezada sofre metan iha matan okos no moras. Kazu ne'e akontese kuandu arguidu atu sai la'ó pasiar ho sira nia oan maibé lezada rejeita tanba rai nakaras ona. Kazu ne'e aneksa hamutuk ho relatóriu médiku husi Pradet no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun no deklara katak nia hatene kuandu baku ema sei prejudika ema nia saúde fíziku no sofre moras ka kanek maibé arguidu nafatin halo. Mezmu nune'e, arguidu arrepende ninia hahalok no promete sei la halo tan hahalok hanesan hasoru lezada iha futuru. Arguidu deklara tan katak arguidu ho lezada dame malu ona no kontinua hela hamutuk to'ó agora. Arguidu foin primeiravés halo krime no mai hatan iha iha tribunál, iha oan na'in tolu ho rendimentu kada fulan US\$191.00 tanba arguidu serbisu hanesan funsionáriu kontratadu iha Sekretariu Rejionál ba Asuntu Administrasaun.

Aleinde ne'e, lezada kontinua konfirma faktu hotu iha akuzasaun no deklara katak depoisde akontesimentu ne'e sira dame malu kedas. Lezada haktuir katak lezada ba iha polísia apresenta keixa no ba iha ospital halo tratamentu hafoin fila kedas ba iha sira nia uma. Lezada akresenta mós katak arguidu foin primeiravés halo krime no to'ó agora arguidu la komete ona krime hasoru lezada.

Alegasaun finál

Prokuradór konsidera arguidu provadu halo agresaun fízika hasoru nia feen bazeia ba arguidu nia konfisaun. Prokuradór akresenta katak basa no lori kapasete baku lezada bele prejudika saúde no fíziku lezada nian maibé arguidu nafatin halo. Bazeia ba konsiderasaun sira ne'e, husu ba tribunál atu kondena arguidu tuir pena ne'ebé hakerek ona iha artigu 145 KP.

Enkuantu defeza solisita ba tribunál atu aplika pena ne'ebé adekuaudu tuir arguidu nia sala ho konsiderasaun katak iha produsaun ba prova arguidu konfesa intregalmente ba faktu sira iha akuzasaun, arrepende ninia hahalok, dame malu ona ho lezada, kolabora ho tribunál. Arguidu

mós promete sei la halo tan krime hasoru nia membru família ka ema seluk iha futuru no arguidu mak iha responsabilidade ba nia oan na'in tolu inklui lezada rasik.

Desizaun

Tribunál prova katak arguidu basa dala ida iha lezada nia hasan loos no uza kapasete baku dala ida iha matan okos parte loos. Bazeia ba faktu provadu sira ne'e no tetu sirkunstánsia atenuante sira no agravante sira, tribunál konklui prosesu ne'e no kondena arguidu ho pena prizaun fulan tolu suspende ba tinan ida.

21. Krime ofensa ba integridade fízika simples ho natureza violénsia doméstika

Nú. Prosesu : 0187/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena multa US\$60.00

Iha 27 Jullu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida JA hasoru nia la'en, iha Distritu Oekusi.

Akuzasaun Prokuradór

Prokuradór akuza katak iha 11 Dezembru 2019, maizumenus iha tuku 19:00 kalan, arguida lori batako rohan ida no tuda kona iha lezadu nia liman karuk rezulta kanek ki'ik. Arguidu mós lori ai-sanak ida no tuda iha lezadu nia ain parte karuk rezulta kanek ki'ik. Aktu hirak ne'e akontese kuandu arguida ho lezadu diskute malu kona-ba osan US\$30.00 ne'ebé lezadu uza hola hotu sasan motor nian. Hafoin akontesimentu ne'e, lezadu ba halo tratamentu médiku iha Ospital Referral Oekusi no fotografia husi polísia.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa no konjuga ho artigu 2, 3(d), 35(b) no 36 LKVD.

Produsaun ba prova sira

Iha julgamentu, arguida konfesa faktu sira hotu iha akuzasaun no deklara katak arrepende ona ninia hahalok. Arguida mós deklara katak foin primeiravés halo krime no mai hatan iha tribunál no mós promete sei la halo tan agresaun ruma hasoru lezadu. Arguida hatutan katak serbisu nu'udar kliner iha Kompañia ida ho rendimentu kada fulan US\$124.00, iha oan na'in rua no di'ak malu ona ho lezadu to'o agora.

Aleinde ne'e, lezadu kontinua konfirma faktu sira iha akuzasaun no deklara katak sira dame malu ona no hela hamutuk to'o agora.

Alegasaun final

Prokurador konsidera arguida provadu praktika krime tuir faktu sira iha akuzasaun no konsidera arguida ninia hahalok ne'e hanesan dolu direitu tanba diskute malu to'o uza batako rohan no ai tuda halo kanek lezadu iha liman no ain. Tanba ne'e, husu ba tribunál atu kondena arguida tuir moldura penál iha artigu 145 KP.

Entretantu defeza husu ba tribunál atu kondena arguida ho pena ne'ebé kmaan tanba arguida konfesa integralmente ba faktu sira, arrepende ona ninia hahalok no promete sei la halo tan krime hasoru lezadu iha futuro. Arguida mós foin primeiravés halo krime no mai hatan iha tribunál, dame malu ona no iha oan na'in rua.

Desizaun

Tribunál prova katak arguida lori batako rohan ida no tuda kona iha lezadu nia liman karuk no lori ai-sanak ida tuda kona iha lezadu nia ain parte karuk. Faktu sira provadu bazeia ba konfiksaun husi arguida inklui konfirmasaun husi lezadu no relatóriu médiku husi Ospital Referral Oekusi no fotografia husi polísia.

Tribunál tetu ba sirkunstánsia atenuante sira hanesan arguida konfesa, arrepende ona ninia hahalok, di'ak malu ona ho lezadu, arguida serbisu ho rendimentu kada fulan US\$124.00 no iha oan na'in rua.

Bazeia faktu provadu sira no ba sirkunstánsia sira refere, nune'e tribunál konklui prosesu ne'e no kondena arguida ho pena multa US\$60.00 ne'ebé kada loron arguida sei selu 0,50 durante loron 120. Tribunál mós fixa pena alternativa durante loron 80 iha prizaun kuandu arguida la kumpri pena multa ne'e.

22. Krime ofensa ba integridade física simples ho natureza violência doméstica

Nú. Prosesu : 0009/20.OESIC
Kompozisaun Tribunál : Singulár
Juis : Dr. Hugo da Cruz Pui
Prokurador : Dr. Pedro Baptista Aleixo Dos Santos
Defeza : Dr. Calisto Tout
Desizaun : Pena prizaun fulan 3 suspende ba tinan 1

Iha 27 Jullu 2020, Tribunál Distritál Oekusi prezide leitura sentensa ba krime ofensa ba integridade física simples ho natureza violência doméstica ne'ebé envolve arguidu HBC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 08 Janeiru 2020, maizumenus iha tuku 19:00 kalan, arguidu lori nia liman loos no basa dala ida iha lezada nia hasan loos no dala ida iha hasan karuk rezulta moras. Antes ne'e, arguidu no lezada diskute malu kona-ba lezada mensagen ba arguidu atu hola fos rai hodi halo sasoro ba sira nia oan maibé arguidu la hola. Kazu ne'e aneksu hamutuk ho relatóriu médiku husi Ospital Referral Oekusi no fotografia husi polisia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende ona ba nia hahalok. Arguidu mós deklara katak dame malu ona ho lezada no moris hamutuk nafatin hanesan feen ho la'en. Arguidu hatutan katak foin primeiravés halo krime mai hatan iha tribunál no arguidu nu'udar xefe suku ho rendimentu kada fulan US\$162.00 no iha oan na'in tolu. Arguidu haktuir katak lezada ba hala'o tratamentu iha ospital no arguidu tuir ba ospital no lori fila lezada ba iha sira nia uma.

Entretantu lezada konfirma faktu hotu iha akuzasaun prokuradór no deklara katak depoisde akontesimentu ne'e sira dame malu kedas. Lezada hatutan katak arguidu foin primeiravés halo krime hasoru lezada.

Alegasaun final

Prokuradór konsidera arguidu provadu halo duni agresaun física hasoru nia feen liuhusi basa dala ida iha hasan loos no basa dala ida iha hasan karuk. Prokuradór hatutan katak arguidu nu'udar xefe suku iha koñesementu kona-ba hahalok krime sira no hatene di'ak sobre maneira atu prevene hahalok krime nian. Tanba ne'e, presiza iha prevensaun jerál atu evita arguidu repete nia hahalok iha futuro. Aleinde ne'e, tanba krime violénsia doméstika maioria akontese maka'as iha Rejiaun Oekusi kompara ho munisípiu sira seluk, husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza husu ba tribunál atu fó pena ne'ebé adekua ba arguidu tanba iha produsaun ba prova, arguidu konfesa, arrepende ninia hahalok no di'ak malu ona ho lezada. Arguidu mós foin primeiravés mai hatan iha tribunál, kolabora di'ak ho tribunál, arguidu promete sei la repete tan nia hahalok hirak ne'e iha futuro no arguidu mak iha responsabilidade ba sira na oan na'in tolu inklui lezada.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia hasan loos no dala ida iha hasan karuk. Tribunál konsidera arguidu nu'udar xefe suku hatene di'ak liu kona-ba aktu krime sira hanesan ne'e maibé pelu kontráriu arguidu mak fó ezemplu ladi'ak ba iha comunidade. Aleinde ne'e, arguidu ninia hahalok ne'e konsidera hanesan dolu direitu.

Bazeia ba prova sira ne'e no sirkunstánsia sira hotu hanesan krime violénsia doméstika barak liu akontese iha Rejiaun Oekusi kompara ho munisípiu sira seluk, arguidu nu'udar xefe suku, arguidu kolabora ho tribunál, konfesa faktu hotu, arrepende ona ba ninia hahalok, foin primeiravés halo krime no mai hatan iha tribunál, rendimentu kada fulan US\$162.00 no arguidu iha oan na'in tolu. Tanba ne'e, tribunál konklui prosesu ne'e no kondena arguidu ho pena prizaun fulan tolu suspende ba tinan ida.

23. Krime ofensa ba integridade fízika simples ho natureza violénsia doméstika

Nú. Prosesu : 0117/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun fulan 6 suspende ba tinan 1

Iha 28 Jullu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FXC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 08 Agostu 2019, maizumenus iha oras tuku 09:00 dadeer, arguidu lori ai-sar futun ida no baku dala rua iha lezada nia kotuk laran rezulta moras. Antes ne'e, lezada ho arguidu diskute malu kona-ba osan US\$20.00 lakon iha gaveta almáriu nian. Kazu ne'e aneksa hamutuk ho relatóriu médku husi Pradet maibé antes ne'e lezada refere husi Ospital Referral Oekusi no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklarata katak arrepende ninia hahalok. Arguidu mós deklarata katak dame malu ona ho lezada no moris hamutuk nafatin hanesan feen ho la'en. Arguidu hatutan katak foin primeiravés halo krime no

mai hatan iha tribunál no serbisu hanesan negosiante ki'ik ho rendimentu kada fulan US\$100.00 no arguidu iha oan na'in lima. Arguidu hatutan katak depoisde lezada ba halo tratamentu iha ospital, lezada ba tiha iha nia maun sira no liu tiha loron haat mak arguidu ba lori fila lezada ba iha sira nia uma.

Aleinde ne'e, kontinua lezada konfirma faktu hotu iha akuzasaun prokurador nian no haktuir katak liutiha loron haat, arguidu ba bolu lezada iha nia maun sira nia uma. Lezada mos deklarata katak arguidu foin primeiraves halo krime hasoru lezada.

Alegasaun final

Prokurador konsidera arguidu provadu halo agresaun fizika hasoru nia feen tuir faktu sira iha akuzasaun. Arguidu nia aksaun ne'e hasoru fetu ne'ebe laiha forsa atu halo reasaun hasoru arguidu. Prokurador reforsa liutan katak krime violensia domestika maioria akontese iha Rejiaun Oekusi kompara ho munisipiu sira seluk. Tanba ne'e, atu halo prevensaun iha futuru, husu ba tribunál atu kondena arguidu ho pena ne'ebe previstu iha artigu 145 KP.

Entretantu defeza husu ba tribunál atu konsidera arguidu nia deklarasaun onestu katak arguidu uza-aisar baku duni lezada dala rua iha kotuk laran. Aleinde ne'e, arguidu kolabora di'ak ho tribunál, arrepende ona ninia hahalok no foin primeiraves halo krime. Arguidu mos iha oan na'in lima no iha responsabilidade tomak ba iha nia familia. Arguidu hanesan negosiante ki'ik ho rendimentu kada fulan US\$100.00. Tanba ne'e, husu ba tribunál atu aplika pena ne'ebe adekua ba arguidu.

Desizaun

Depoisde avalia faktu hotu, tribunál prova katak arguidu lori ai-sar futun ida no baku dala rua iha lezada nia kotuk laran. Arguidu nia hahalok ne'e prejudika lezada nia kondisaun fiziku no konsidera arguidu nia hahalok ne'e kategoria ba iha dolu direitu.

Bazeia ba faktu provadu no sirkunstansia sira hotu ne'ebe mak hatodan no hakaman arguidu nia responsabilidade kriminál, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

24. Krime ofensa ba integridade fizika simples ho natureza violensia domestika

Nú. Prosesu	: 0135/19.OESIC
Kompozisaun Tribunál	: Singulár
Juis	: Dr. Hugo da Cruz Pui
Prokurador	: Dr. Mateus Nesi
Defeza	: Dr. Calisto Tout
Desizaun	: Pena prizaun tinan 1 suspende ba tinan 1 fulan 6

Iha 28 Jullu 2020, Tribunál Distritál Oekusi prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AB hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 31 Maiu 2019, maizumenus iha oras tuku 08:00 dadeer, arguidu buti dala ida iha lezada nia kakorok, riba lezada ba iha rai no lori ain-tur hanehan iha lezada nia hirus-matan. Aktu sira ne'e rezulta kanek ki'ik iha lezada nia ain-tur, mean no moras iha hirus-matan no iha kakorok. Antes ne'e, sira nia oan tanis no hakarak atu lezada mak fó hatais maibé lezada haruka fali arguidu tanba lezada sei fase hela ropa maibé sira nia oan rejeita no kontinua tanis. Ho nune'e, arguidu halo agredaun refere. Kazu ne'e aneksa hamutuk ho relatóriu médiku husi Pradet ne'ebé antes ne'e lezada refere husi Ospital Referral Oekusi no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun no deklara katak nia hatene kuandu baku ema sei prejudika ema nia saúde fíziku no sofre moras ka kanek maibé arguidu nafatin halo. Mezmu nune'e, arguidu arrepente ninia hahalok no promete sei la halo tan hahalok hanesan hasoru lezada iha futuru. Arguidu deklara tan katak arguidu ho lezada dame malu ona no kontinua hela hamutuk to'o agora. Arguidu ho onestu deklara katak antes ne'e basa lezada maibé la konsege mai to'o iha tribunál tanba laiha ema ruma mak keixa. Arguidu hatutan katak foin primeiravés mai hatan iha iha tribunál, iha oan na'in tolu ho rendimentu kada fulan US\$115.00 tanba arguidu serbisu hanesan seguransa iha Kompañia Maubere.

Aleinde ne'e, lezada kontinua konfirma faktu hotu iha akuzasaun no deklara katak sira di'ak malu ona to'o agora. Lezada mós deklara katak antes ne'e arguidu basa duni lezada maibé lezada lakohi hato'o keixa tanba sei perdua arguidu.

Alegasaun final

Prokuradór konsidera arguidu provadu halo agresaun fízika hasoru lezada. Prokuradór hatutan katak buti kakorok, riba ba rai no lori ain-tur hanehan lezada iha hirus-matan la'os maneira ne'ebé di'ak atu eduka ema seluk tanba maneira ne'e bele prejudika ema nia kondisaun fíziku ka saúde. Bazeia ba konsiderasaun sira ne'e, husu ba tribunál atu kondena arguidu tuir moldura penál iha artigu 145 KP, nu'udar edukasaun ida arguidu atu la repete ninia hahalok hasoru lezada ka ninia membru família sira.

Enkuantu defeza haktuir katak arguidu konfesa intregalmente ba faktu sira iha akuzasaun, arrepende ninia hahalok, dame malu ona ho lezada, kolabora ho tribunál. Arguidu mós promete sei la halo tan krime hasoru nia membru família ka ema seluk iha futuru no arguidu mak iha responsabilidade ba nia oan na'in tolu inklui lezada rasik. Bazeia ba sirkunstánsia sira ne'e hotu, defeza husu ba tribunál atu aplika pena ne'ebé adekuaudu ba arguidu.

Desizaun

Tribunál prova katak arguidu buti dala ida iha lezada nia kakorok no riba lezada ba iha rai. Tribunál mós prova katak arguidu lori nia ain-tur hanehan iha lezada nia hirus-matan. Bazeia ba prova sira ne'e no sirkunstánsia agravante no atenuante sira hanesan arguidu halo agresaun dala barak hasoru lezada, arguidu konfesa, arrepende ninia hahalok, dame malu ona ho lezada, foin primeiravés halo krime, oan na'in tolu no promete katak sei la repete ninia hahalok iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl